

藝術典第四百六十卷

醫部彙考四百四十

小兒腫脹門

宋錢乙小兒直訣 腹脹

腹脹而悶亂喘滿者實也用紫霜丸白餅子若不悶亂喘滿者脾虛也誤下之以致目胞腮面四肢浮腫肚腹愈脹以塌氣丸主之因下而喘脾氣益虛也脾虛不能勝腎水隨肺氣行於四肢如水狀若侵浮於肺卽大喘也

註

按腹脹喘滿脾肺虛而氣不歸源者用補中益氣湯若因下脾肺氣虛

而面目四肢浮腫等證者用金匱加減腎氣丸況此證有因乳母脾胃宿積飲食傷脾所致其白餅子紫霜丸必形病俱實方可用塌氣丸亦非調補之劑宜審用之

若腎熱傳於膀胱熱甚逆於脾肺脾胃虛而不能制腎水流走四肢而身面皆腫若上勝則形於肺故令喘也

註

按肺主氣腎主水前證因稟賦不足或因大病後或誤行汗下致脾虛不能制水而

溢皮膚肺虛不能攝氣而氣上逆宜用六味丸補中益氣湯治之如小便不利用金匱加減腎氣

丸腎經虛火上炎肺熱作喘者用六味地黃丸心火熾盛肺熱作喘者用人參平肺散凡此皆屬腎經陰虛熱證用六味丸壯水爲主若用清熱分利之藥則誤矣

元張從政儒門事親 小兒風水

鄺之營兵秋家小兒病風水諸醫用銀粉粉霜之藥小洩反澀飲食不進頭腫如腹四肢皆滿狀若水晶家人乃爲勉強求治於戴人戴人曰此證不與壯年同壯年病水者或因留飲及房室此小兒纔七歲乃風水證也宜出汗乃置燠室以屏帳遍遮之不令見火若內火見外火必昏憤也使大服胃風湯而浴之浴訖以布單重覆之凡三五重其汗如水腫乃減五分隔一二日乃依前治之汗出腫減七分乃二汗而全減尙未能食以檳榔丸調之兒已喜笑如常日矣

通身浮腫

小兒通身浮腫是水氣腫也小便不利者通小便則愈內經曰三焦閉塞水道不行水滿皮膚身體否腫是風乘濕之證也可用長流水加燈心煎五苓散時時灌之更於不透風暖處頻治汗出則腫消腫消則自愈一汗減半再汗減七八分三汗消盡內外兼治故也

明魯伯嗣學嬰童百問 虛實腫脹

議曰腫脹二證此由虛中有積久患失治日漸傳變證候多端隨輕重察盛衰審表裏以主治先固其本後正其標斯無恙矣有濕腫有毒氣腫傷寒虛腫瀉痢虛腫氣血虛腫有疳脹氣脹癥積脹鎖肚脹腕膈脹食膨脹蛔虵脹虛冷積脹以上腫脹虛積竝當下之各有其法其受濕於脾胃久不斂化氣浮四肢頭面皆腫由食毒氣傷於脾胃冷積毒氣停留於脘膈致虛入腹作腫傷寒下之太蚤乘虛入腹作腫瀉利之人脾氣亦虛是以致腫以上宜平調胃氣補臟充實方可去腫其氣血虛腫皆由榮衛不順臟腑怯弱壅滯三焦流注百脈表裏俱虛邪正相亂以致四肢浮腫腹肚膨滿以上先調榮衛之順次服分氣以散之其疳氣積脹宜先與保童兼塌氣以去之渴丸子亦可治其痞癖氣脹癥脹宜三稜以消痞其鎖肚脹宜與珍珠天麻丸以通之其上脘中脘食傷膨脹宜三稜塌氣大棗連丸以消磨之其蛔虵脹宜下蟲丸以化之其虛冷積脹宜沉香煎以溫之以上諸證宜調和胃氣消磨通利腫脹必然平復矣如有熱者必以葶蘆牽牛等輩以治之推氣丸劑亦可服有實熱脹滿者大承氣湯主之一法用五苓散吞紫霜丸量虛實用丸數亦妙熱輕者大柴胡湯治之

王肯堂曰按百問分證雖詳而偏于攻下若無錢張活法薛氏補法以主之鮮不殺人慎之

樓英醫學綱目 腫病

腫病腎熱傳於膀胱熱盛逆於脾胃脾虛而不能制腎水反尅脾土脾隨水行脾主四肢故流走而身面皆腫也若加喘者重也何以然腎水勝而尅退脾土反勝心火心又勝肺肺爲心尅故喘或問曰心刑肺肺本見虛今何喘實曰此有二一者肺大喘此五臟逆二者腎水氣上行傍侵肺故令大喘此皆難治

徐春甫古今醫統 濕證候

巢氏曰濕者水氣也活人書云風雨襲虛山澤蒸氣豈止大人中濕小兒亦有受濕者緣小兒入夏以來脾胃虛弱腠理開疏或因連日陰雨或地蒸濕小兒坐臥於上便受熱氣脉見沉緩身體煩痛發熱惡寒或多汗惡風精神昏悶或小便不利大便溏瀉若久不愈則手足垂躄入臟則瘖啞不言治法大要疏利小水其濕自除不可發汗及峻攻之

水腫不治證

凡水腫先起於四肢而後歸於腹者不治大便滑泄與夫脣黑缺盆平臍突足平背平或肉硬或手
掌平或男從腳下腫而上女從身上腫而下竝皆不治

王肯堂證治準繩 腹脹

腹脹由脾胃虛而氣攻所作也實者悶亂喘滿可下之用紫霜丸白餅子 此言未下而喘者爲實
故可下若誤下而喘者爲虛氣附肺不可下也

不喘者虛也不可下若誤下之則脾虛氣上附肺而行肺與脾子母皆虛肺主目胞腮之類脾主四
肢母氣虛甚卽目胞腮腫四肢黃色治之用塌氣丸漸消之未愈漸加丸數不可以丁香木香橘皮
豆蔻大溫散藥治之何以然脾虛氣未出故雖腹脹而不喘可以溫散藥治之使上下分消其氣則
愈矣若虛而氣已出附肺而行卽脾胃內弱每生虛氣入於四肢面目矣小兒易爲虛實脾虛則不
受寒溫服寒則生冷服溫則生熱當識此勿誤也胃久虛熱多生痘病或引飲不止脾虛不能勝腎
隨肺之氣上行於四肢面目腫若水狀腎氣漫浮於肺卽大喘也此當用塌氣丸漸加丸數病愈後
面未紅者虛衰未復故也 此下後喘故宜塌氣丸若未下而喘宜下之

治腹脹者譬如行兵戰寇於林寇未出林以兵攻之必可獲寇若出林不可急攻攻則必有失當以意漸收之卽順也 寇未出林謂虛氣未出而不喘不目胞腮腫故可用丁香木香大溫散藥上下分消其氣而愈也寇已出林謂虛氣已出爲喘爲目腮腫須用塌氣丸漸漸消之

治小兒虛腹脹先服塌氣丸不愈腹中有食積結糞小便黃時微喘脈伏而實時飲水能食者可下之蓋脾初虛而後有積所治宜先補脾然後下之後又補脾卽愈也若不先補脾而便下之則大虛矣不可補肺恐生虛喘

潔古論腹脹虛實

凡久病吐瀉之後虛則其脈微細肺主目胞及腮脾主四肢若色淡黃目腮虛腫手足冷先服塌氣丸後服異功散和中丸四君子湯益黃散之類用諸溫藥養真氣 實則脈洪實不因吐瀉久病

後亦不因痢下腹脹而喘急悶亂更有痰有熱及有宿食不化而腹脹者宜服白餅子大黃丸解毒丸下之兼須詳認大小便如都不通先利小便後利大便 雲岐云小兒熱結於內腹脹壯熱大

便赤黃躁悶煩亂者宜瀉青丸

東垣云寒脹多熱脹少皆主於脾胃虛者宜用六君子湯若喘

而氣短者脾肺氣虛也用異功散補之若服剋伐之類而喘脹益甚者脾肺之氣復傷也用前湯加半夏升麻若既下而不喘則邪氣去而肺氣寧也不必用藥或病久小便不利或四肢浮腫者脾肺之氣虛不能通調水道也用金匱加減腎氣丸主之或手足逆冷睡而露睛脾胃虛寒也用六君子加炮薑手足不冷睡而露睛脾胃虛弱也用六君子湯若面色青木剋土也用六君木香柴胡更當調治乳母節其飲食恐藥餌過劑復傷胃氣故也

水腫

演山云腫脹二證此由虛中有積久患失治日漸傳變證候多端隨輕重察盛衰審表裏以主治先固其本後正其標斯無恙矣

曾氏治法

原腫病之由標本之疾腎主元氣天一之水生焉肺主沖化地四之金屬焉腎爲本而肺爲標皆至陰以積水其爲病也腎者胃之關鍵關鍵不利樞機不轉水乃不行滲於脉絡皮膚而爲浮腫當推究內外所因而爲施治兒大者憑脈以明虛實古方有十種論證短氣不得臥爲心水兩脅緊痛爲

肝水大便鴨溏爲肺水四肢苦重爲脾水腰痛足冷爲腎水口苦咽乾爲膽水乍虛乍實爲大腸水腹急肢瘦爲膀胱水小便閉澀爲胃水小腹急滿爲小腸水然脈浮爲風爲虛沉伏爲水病沉則脈絡虛伏則小便難卽爲正水脾脈虛大多作脾腫因循不治乃成水腫蓋脾屬土喜燥而惡濕常感濕氣濕喜傷脾血化爲水土敗不能制水則停蓄不行留滯皮膚故作浮腫初得病時見眼泡早晨浮突至午後稍消以羌活散疏解次醒脾湯主之及間投南星腹皮散其脾冷困則燥以草果縮砂之類然此證夏與秋冬治之頗易惟春不然蓋四時之水無如春水泛溢兼肝木旺而脾土受尅不能受水所以難療進退不常須徐徐調理取效若脾熱而困又有熱藥燥之雖火能生土亦可勝水奈何燥之太過土不敵火則熱愈甚而不食發熱煩渴醫者又進之以燥劑由此而面目轉浮致脾敗而手足背皆腫蓋手足背與臍凸卽脾之外候有未經發表遽用下藥以瀉之則一瀉而腫消乃曰得瀉之力殊不知脾愈瀉而愈虛不逾旬月其腫如初此世人卽知瀉腫爲最而不求其十補勿一瀉之論法當隨四時用藥解表通利小便春以七寶散加麻黃桂枝赤茯苓水薑蔥煎服夏以五苓散加麻黃車前子薏苡仁秋以清肺飲加羌活細辛商陸冬以沖和飲加白朮生川烏赤小豆以

上三藥竝用水葶煎次投滋潤救脾導水湯劑滲泄之乃爲良法更以商陸胃苓丸赤蒼飲頓服自然獲安蓋內經云開鬼門潔淨府平治權衡以平爲期此之謂也 有初中便覺痰嗽氣喘小

水不通正屬肺腎所主先服解表散次以三白散爲治餘證輕者投商陸丸故經曰其高者因而越之卽湧吐之義也下者引而竭之卽滲瀉之義也凡得此病非一朝一夕之故不可以孟浪之藥求其速效以致虛脫如愈後再感外風滿面虛浮用排風湯和解仍服前救脾湯劑免致反覆飲食之忌惟鹽醬醃酢濕麵皆味鹹能溢水者并其他生冷毒物亦宜戒之重則半載輕則三月須脾胃平復腫消氣實然後於飲食中旋以燒鹽少投則其疾自不再作故劉氏曰治腫非易補養尤難所忌者切須詳審有經久不消者下濬川丸卽效

演山治法

受濕腫脚手面目虛浮

食毒氣腫腹肚腎蠱脹急

傷寒虛氣入腹腫

瀉痢虛氣入腹

腫

此四種所患病不相同皆由虛而得之受濕謂脾胃受濕冷久不化氣浮四肢頭面皆腫

食毒氣由脾胃傷之冷積毒氣停留胃脘致虛入腹作腫傷寒由下之太早乘虛入腹作腫瀉痢之

久脾氣亦虛是以致腫以上宜平調胃氣補臟充實方可去腫先服四味理中乾薑減半加白朮桑白皮同煎傷寒虛腫加枳實作喘加淡豆豉瀉痢虛腫服正氣調胃胃氣既壯以救生丹利之其腫卽退再調補臟腑用觀音散卽平復矣

氣虛腫亦名氣蠱

血虛腫亦名血蠱

榮衛俱

虛腫亦名氣血蠱

小兒所患腫脹一門最爲要急前人少有究竟然腫脹之作皆由榮衛不順

臟腑怯弱壅滯三焦流注百脈表裏俱虛邪正相亂所以致受四大浮盛腹肚膨滿多由食毒得之飲食得之蠱傷得之飢飽得之積久不化故成斯病病由虛得或則妄爲通下因虛致虛根不得去疾加已甚是爲壞證危候智者怯而爲辭庸者暴以攻擊二醫不同誠屬難治智者商之良者審之疑者塌之

疑其病甚不可利只與塌其氣

明者調之

正榮衛也

先調榮衛之順次服分氣飲子以散其滯斯病去矣

薛氏治法

經曰至陰者腎水也少陰者冬脈也其本在腎其末在肺皆積水也又曰腎者胃之關也關門不利故聚水而從其類也上下溢於皮膚故肘腫腹大上爲喘呼不得臥者標本俱病也丹溪云惟腎虛不能行水脾虛不能制水胃與脾合又胃爲水穀之海因虛而不能傳化腎水泛濫反得以浸漬脾

土於是三焦停滯經絡壅塞水滲於皮膚注於肌肉而發腫也其狀目泡上下微起肢體重著喘嗽怔忡股間清冷小便澀黃皮薄而光手按成窠舉手卽滿是也有受濕氣者由脾胃之氣敦阜四肢頭面皆腫也食毒者脾傷積毒停留於胃也傷寒下早者邪氣乘虛而入也瀉利後者脾氣虛也皆宜先調胃氣次可治腫其患七脹皆由血氣不足臟腑怯弱表裏俱虛邪正相亂以致四肢浮腫腹肚膨滿亦當先調榮衛分別陰陽治法宜補中行濕利小便凡有熱者水氣在表也可汗之身無熱者水氣在裏也宜下之腰已下腫宜利小便腰已上腫宜發汗此仲景之法也若遍身腫煩渴小便赤澀大便秘結此屬陽水遍身腫不渴大便溏瀉小便清利此屬陰水陽水兼陽證者脈必浮數陰水兼陰證者脈必沉遲氣若陷下宜用二陳加升提之藥如腹脹少加水香調之若朝寬暮急屬陰虛朝用四物湯加參朮夕用加減腎氣丸朝急暮寬屬陽虛朝用六君子湯夕用加減腎氣丸朝暮皆急陰陽俱虛也用八珍湯主之眞陽虛者朝用八味地黃丸夕用補中益氣湯若肚腹痞滿肢體腫脹手足竝冷飲食難化或大便泄瀉呼吸氣冷此眞陽衰敗脾肺腎虛寒不能司攝而水泛行也急用加減腎氣丸否則不治惟調補脾土多有生者

小兒衛生總微論方 腫病論

小兒腫病有二一者氣腫因脾胃虛而氣攻腹腹脹誤行轉藥下之致虛氣上附於肺行入四肢面目而作腫也疝氣亦然二者水腫因上焦煩渴飲水無度脾胃虛而不能約制其水腎反乘脾土隨水行上附於肺主皮膚脾主四肢故水流走於四肢皮膚而作腫也甚則腎水浸浮於肺則生大喘爲難治也

水腫

水腫之證脾土受虧不能制水腎水泛溢浸漬脾土水滲皮膚肌肉發腫面腫曰風脚腫曰水手按成窟舉手卽滿脣黑傷肝心平傷心臍突傷脾足平傷腎背平傷肺水氣身熱在表可汗水氣身涼在裏可下通利小便順氣和脾證雖可下不可峻攻肚上青筋腹滿滑泄名爲蠱脹腫先起腹後散四肢順候可下先腫四肢後歸肚腹逆候難醫男足腫上女足腫下肉硬掌平卽不可治秋春頗易冬夏難治重者半載輕者三月治腫非易補養尤難腰以下腫當利二便腰以上腫須當發汗

小兒腹脹有虛有實小便不利悶亂喘急者此邪氣之實也宜分氣飲塌氣丸小便自利不喘面目四肢浮腫者此正氣之虛也或瘧痢經久或飲食傷脾虛氣妄行並宜補脾飲或理中湯加草果砂仁藷子

方

塌氣丸

錢乙小兒直訣

治小兒虛脹

胡椒一兩

蠍尾半兩

右爲末麵糊爲丸粟米大每服五七丸陳米飲下一加木香一錢一加萊

腹子半兩

薛已曰二味惟錢氏潔古用之後有牽牛者須慎

加減腎氣丸

金匱

治脾胃虛腰重脚腫小便不利或肚腹腫脹四肢浮腫或喘急痰盛已成蠱者此

證多因脾胃虛弱治失其宜元氣復傷而變者非此藥不救

白茯苓三兩

附子炮五錢

川牛膝

肉桂

澤瀉

車前

山萸

山藥

丹皮各一兩

熟

地黃四兩搗碎酒拌杵膏

右爲末和地黃膏加煉蜜杵丸桐子大每服一二十丸空心米湯下

升陽益血湯

蘭室秘藏下同

二月間有一小兒未滿一百日病腹脹二日大便一度瘦弱身黃色宜升陽

氣滋血益血補血利大便

嫩梢二分 神麴末 升麻各三分 當歸 厚朴各一錢 桃仁十個 右都作一服水一大盞煎至半盞去粗食達熱服

厚腸丸 治小兒失乳以食飼之未有食腸不能尅化或生腹脹四肢瘦弱或痢色無常

厚朴 青皮各二分 橘紅 半夏 蒼朮 人參各三分 枳實 麥芽 神麴各五分 右爲

極細末水煮麵糊爲丸如麻子大每服二十丸溫水送下食前忌飽食

褐丸子

嬰童百問下同

治小兒疳積腫脹

蘿蔔子一兩微炒研 陳皮 青皮 檳榔 五靈脂 蓬莪朮麵裹煨 赤茯苓各半兩 黑牽

牛取淨末半生半炒 木香各二錢半 右爲末麵糊丸如菉豆大每服十五丸蘇葉泡湯送下

紫霜丸 治變蒸發熱不解并傷寒溫壯汗後不歇胸中有痰癖乳哺不進乳則吐覘先寒後熱者

又治食積乳哺失節宿滯不化或因食而發痢大便酸臭竝宜服之

代赭石煨醋淬七次 赤石脂同上製各一錢 杏仁五十枚去皮尖 巴豆三十枚去皮膜心油

先將杏仁巴霜入乳鉢內細研如膏却入代赭石脂末研勻以湯浸蒸餅爲丸如粟米大一歲服五丸米飲吞下一二百日內兒三丸乳汁下更宜量其虛實加減微利爲度此藥兼治驚痰諸疾雖下不致虛人

白餅子 治小兒夾食傷寒其證發熱嘔吐亦有肚疼者噯氣辨得分曉先用此藥一服推下食積却用平和藥發散調治如惺惺散加減參蘇散皆可服却不可服冷藥

滑石 天南星 半夏各一錢 輕粉五分 巴豆二十四個去皮膜用水一升煮乾研細 右三味搗羅爲末入巴豆霜次入輕粉又研勻卻入餘藥末令勻糯米飲丸如菉豆大量小兒壯瘦虛實用藥三歲已下每服三丸至五丸紫蘇湯空心下忌熱物若三五歲兒壯實者不以此拘加至二十丸以利爲度

塌氣丸 治小兒疳氣腹脹喘急并面目浮腫

丁香 胡椒各一錢 蘿蔔子 生白牽牛各三錢 右爲末麵糊丸如小豆大三歲三十丸米湯

下

三稜煎丸 治嬰孩食傷生冷甜膩毒熱等物脾胃積滯久不化令兒腹熱脚冷瘡癰寒熱及癰瘰中脘不和膨脹上膈氣壅心腹不得宣通所以作疾此藥溫涼但是諸積滯食不化並宜與服

京三稜 蓬朮各半兩煮 芫花二錢半醋炒 川當歸 鼈甲醋炙各半兩 巴豆二十一粒

淡豉二錢 杏仁去皮尖炒三錢 右將三稜蓬朮芫花鼈甲醋煮令乾炒剉碎爲細末次入當歸末又入杏仁巴豆淡豉和勻水煮白麪爲丸麻子大每服二十丸生薑湯下大小加減服之

大承氣湯 治剛瘧胸滿內實口噤咬牙大熱發渴大便澀

大黃 芒硝各半兩 厚朴一兩 枳實二枚 右剉散每服三錢薑三片水一盞煎七分溫服

五苓散 治傷寒溫熱病表裏未解頭痛發熱口燥咽乾煩渴飲水或水入卽吐或小便不利及汗出表解煩渴不止又治霍亂吐利躁渴飲水不徹

澤瀉二兩半 猪苓 白朮 茯苓各一兩半 肉桂一兩 右爲細末每服二錢熱湯調下不拘時服訖多飲熱湯有汗出卽愈 又治瘧熱在裏身發黃疸濃煎茵陳湯下食前服疸病發汗